

Pea via col pe dret l Comun General de Fascia

Te duta la val l'é stat gran partezipazion. Cristina Donei se à vadagnà con gran creta l titol de pruma Procuradora

La Val de Fascia à cernù so prum Procurador del Comun General, o miec sia pruma Procuradora. L'é na femena defat, la professora Cristina Donei da Moena, responsàbola de la scola autes de la Scola de Fascia, persona de gran capacità e esperienza, n muie cognosciuda e aprijèda tel mond de la scola, de la cultura e del sozièl.

La jent se à prejentà a l'apuntament litèl en gran numer (79,95%), desmostran enteress e partezipazion; ence i joegn somea se aer descedà da l'enciapediment per la vita aministrativa e i à palesà voa de tor pèrt a la costruzion de sia comunanza. Ponta via donca te la maniera miora la neva istituzion: la pìcola val ladina arà l met de portèr inant na forma emportant, de autogoern che la é deldut unica, no n'é de valives ne te la Tèlia ne te l'Europa. La दौरa di inomes ladins de la veia comunità de Fascia recuperé dai documenc storicis, desche apontin Procurador e Consei

General, à uzà fora amò de più la particolarità de noscia val te dut l Trentin e ge à fat vadagnèr gran visibilità a livel di media.

Gran sodesfazion per chest ejit litèl é stat uzà fora dal conseier ladin Luigi Chiocchetti travers n document, en particolèr per la afermazion de na femena, "n recognosciment emportant che à premià no demò la calitèdes personèles de la candidata – scrif Chiocchetti – ma ence la carateristiches medemes de la femenes." L conseier à amò sottrissà l gran empegn che duc cogn se tor sù da chiò inant e no demò chi che l'é stat lità: "la responsabilità no cognarà pesèr demò su la encèries maores ma la cognarà vegnir spartida coi aministradores de comune con la medema comunanza" e amò "la cernudes sun nosc davegnir cognarà esser l frut de n sforz comun out a sostegnir l mudament politic e cultural che chestes les raprejentea."



Cristina Donei.

Ence la Union Autonomista Ladina à palesà sia legrezza per l resultat arjont. Trei en particolèr la rejons de sodesfazion per l moviment politic ladin: l gran numer de jent che é jita a dèr sia stima; la litazion con gran ejit de Cristina Donei, candidata sostegnuda apontin da la UAL, e la litazion tel Consei General de ben 5 di 8 candidac prejenté dal moviment medemo. N resultat che fèsc ben sperèr percheche tel davegnir se posse lurèr delvers ensema per l ben comun de Fascia.